



CANNEN ER BARAOUIS.

Ar un ton handuet.

Jesus, péh plijadur
Aveit un inean pur
E zou é græce Doué
Hag én é garanté !



Me gav bèr en amzér,
Hag er poénieu distér,
Dé ha noz pe chonjan
Er joéieu ag en Nean.

A pe sellan d'erhlué,
Doh mein bro, doh en né,
D'inou é carehen
Neijal èl ur glom huen.

Mæs, allas ! chom e hrein,
Beta ne dreimein,
En hur horv zou ponnér,
Èl ur gùir brisonnér.



A pe zeï d'èin merhuel
Péh joé vou dilezel,
Er horv-men danjerus,
Anemis de Jesus.

Guet hirreah é hortan
Me zermén dehuéhan :
Hast e mès de huélèt
Jesus men gùir brièd.

Quentéh èl ma vou bet
Me ranjenneu torret,
Mé hum sànou én air,
Èl ma hra un huédér.

Tremein e hrein el loér,
Aveit monnèt d'er gloér :
Ar en hiaul, er stirèd,
En hum gavein douguet.

Ha nezé me larou :
Tud mem bro, quenavou,
Quenavou, bed chiffus,
Ha déieu anquinus.

Quenavou peuranté,
Quenavou ol tristé,
Quenavou trebilleu,
Quenavou pébedeu.

Pèlloh ne zouguein quet
Ranjen er goal-sperèd ;
Mæs aveit birhu:quin,
Men Doué, en hou càrein !

Er péhedeu marhuel,
Nag er ré véniel
N'helleint quet m'attaquein
Na jamæs me feahein.

Chanjet em bou a stad
Aveit mem brassan vad,
Ha me gùittei en doar
Hemb anquin na glahar.

Me huélou discaret
Me ol anemisèd,
Ha mé victorius,
Dré hou cræce, ô Jesus !

A bep tu pe sellein,
Quement tra e huélein
E gargou me halon
A gonsolation.

Dor en nean digneur-caër
Et me receu ér gloër,
Eir Sænt ha Santésèd
Prest d'em diguemér et.

Guet joé en el laran,
Divis de zén n'hellan
En triomfl e huélein
Ér gloér pe antréein.

M'hum huélou receuet
É palæs en Drindèd,
É creis en inourieu
Hag er mélodieu.

Hag inou aveit mad
É huélein Doué en Tad,
Guet é Vab éternel
Hag er Sperèd-Santel.

Me huélou me Jesus,
Guet un air gracios,
É laquat ar me fèn
Er gaëran courônen.

A p'em diguemérou,
Ag é berh me gleuou:
Deès, servitour fidel,
Deès d'er gloér éternel.

Chonjamb ol dré avance
Péh quer caër recompançe
Zou d'emb ol preparet
E palæs en Drindèd.

Ér baraouis hemb quin
Ni hellou compreñein
Petra e talhue en nean
Hag é joéieu brassan.

Aveit poénieu distér,
Aveid anquinieu bèr,
Ni e vou paiet mad
Guet hun Doué, hur gùir tad.

É huélèt nezé Doué,
Guet er Sænt, en Ælé,
Ni e vou ol coutant,
Hemb eun a chanjemant.

Caër e vou de huélèt
Er Huérhiès beniguet,
Guet en deuzéc stiren
E hra hé hourónen.

Ni e huélou open,
Ranquet én ur vanden,
En Ælé, Arhælé,
Ol é vélein ou Doué;

É cânnein hemb arsàu,
Ar un ton caër ha bràu,
Bennoh ha mélodi
D'ou Doué ha d'hun hani.

Ni e huélou ehué
È lehuiné ha joé,
Ré salvet a bep léh,
Béleau ha menéh.

Patriarchèd ha fidel,
Ha Profætèd santel,
Guet en Apostolèd
Hag en ol Vartyrèd.

Ol curunet a hloér
Balamort d'er victoér
Ou dès bet gouniet
Ar en ol tirandèd.

Guérhiésèd a bep ouaid,
A bep stad Santésèd,
Intanhuésèd, groagué,
Ol courônet guet Doué.

Ol en Æledigueu,
Ar ou achelligueu,
Avel ur taul gurén,
È neijal drest hur pèn.

Eurustèd hemb hé lar!
Dré avanç mé ha câr;
Te gonsol me halon
E peb affliction.

Én ol poénieu calet
A gory pé a sperèd,
Me chonjou noz ha dé
È joé ha gloér en né.

